

快獨集序

雲杜大泌山人李維楨本寧父



鄆人李京兆公畊堯家有樓曰
快獨日讀書其上討論著述卽
家人鮮接見公旣沒而其子從

樓中得手澤而整輯之其姻戚
知交于太僕康直指侯郡李梁
明府相與較訂而付之梨棗本
原公雅尚遂稱之快獨集云蓋
今之作者爭言好古奉若功令

轉相倣以成風盛粉澤而掩質
素繪面貌而失神情故有無病
呻吟無歡強笑師其俚俗以爲
自然襲其叫呼以爲雄奇字琢
句剗拘而不化麋而虎皮鷲而

鳳翰迹若近實愈遠于以命令
當世取須臾之譽猶夫色厲內
荏穿窬之盜耳則獨不快之以
也人生意氣心知靈明變通可
以窮千古羅萬有奚必傷人門
戶拾人咳唾因人嗔喜爲哉今
李公集具在統而評之其襟度
恬靜清遠其格力沉厚雄健其
韻調俊爽妍雅其詞氣平正通
達析而評之其詩古選簡澹近

體朗秀其書牘嫺婉其序記典
則其志載贍藻其奏議論事論
人如指掌列畧規諫之言剴切
而溫恭不翹過不磯怒蓋于古
作者無不取財無不具體而景
之所觸情之所向思之所極匠
心自妙恒超於聞見格局之外
閉門造車出門合轍使古人受
吾役而不爲所役善寫照者傳
其神善臨池者模其意蓋中所

獨得深矣公出而宰邑爲循吏
神君入而居臺爲法家拂士督
學政爲鴻儒嚴師佐九列爲鉅
卿重臣所經歷時態或貴綜覈
或貴建白或貴清談或貴勇退
終不追趨逐嗜人莫得以一節
目公而集亦若是不可名一家
獨知之契執極不變獨運之才
錯出不匱真君子哉余嘗志公
墓于快獨之指未及發明因敘

公集而具論之夫慎獨自慊聖
學第一義公所造詣潔淨精微
迺求之言語文字間固哉余之
知公淺也

京兆李先生快獨集序

快獨集者雍野李先生所爲詩
若文余爲蒐輯而梓存之者也
梓存者何蓋先生才甚高行甚
峻獨立獨行於書無不窺於藝
無不工然特不喜存之以博譽

故其詩若文亦散漫靡考今所
集蓋余與其同里友人司理侯
心于氏托其公子他石盡發蠹
魚之藏而得之者也詩文凡若
千卷間存十五雖不足以盡先
生乎然齊城徑珠楚山寸玉庶
足以窺先生槩矣余辱先生國
士知前役晉聞先生病走役間
之旋已不起矣誼不忍其無傳
因爲次而梓之晉中蓋先生以
儁才侍

今上爲名御史舊理鹺三晉三

晉之人至今思之故刻之此地
且先生攬轡省方風裁矯矯毋
論南北薦紳先生均能道而會
上神聖莫測宵人時訶輕重以
爲奸先生遇靡不言言靡不至
甚至大政大議舉

朝合詞以諍者御史大夫必舉
以屬先生而先生援筆立就每
奏出靡不人人心折也故數十
年來西臺稱直臣者必首先生
然先生退閑多閉室鮮延見卽
居里時蕭然齋署亦靡倡酬之

侶歲時臨眺羣唱和自數友人
之外無與焉聊自愉快而已蓋
先生不喜飲獨與數人者飲必
醉不輕詩獨與數人者游必吟
是可以觀先生之獨矣今先生
之集具在古體五言追建安宋
沈七言律直擬少陵七言絕則
與青蓮龍標爭驅並儷矣今世
人驟聞余論者或謂有然有不
然然使按集而奏之引商比羽
有不信余言之非虛者乎嗚呼
奇矣然先生負甚奇而不欲以

奇見仕踰三十年位僅至京兆
天下方用先生之自快者因以
卜先生之大用乃先生遽已矣
壽未躋耆而位不配才此海內
之所爲聞而悲也悲者此世情
急才之念固然乃先生生且爲
獨守爲好澹且不欲以文自見
而又烏計人之知不知也故嘗
自題其樓曰快獨蓋其脫落一
念見終身之不肯少踰云嘗有
人勸其少爲圓通者先生報詩
曰生來堅把艸頭柁不借人家

水作船鳴呼是可以觀先生之
微矣余讀先生集感其自快之
意仍以快獨名之庶尙論者當
無失先生之真云集初鐫余以
受代去托侯司理氏司理不半
歲又以内艱歸而明府梁君適
來陽曲始成之余再托雲杜李
本寧爲之序夫先生不期世知
而世亦自有愛而傳之如本寧
如明府者是先生之所自快人
固共稱爲無愧者也則集之必
傳無疑矣因述其原而引之首

萬曆戊申孟夏吉日

濟南陵縣門人康丕揚撰



雍野李先生快獨集卷之一

濟水李堯民畊堯父著

四言古詩

乞侯中鵠石竹

森森人立一梅二松兩三竿竹夜來化龍二友
徬徨如駟失蛩君家石竹燁矣南榮無枝不節
如竹斯莖無時不花如竹斯貞二友曰來聊與
弟兄豈其竹名而不竹清願言嫁之成友三生

五言古詩

秋日自述

隱囊宜余嬾況際秋亭馥卧起頗無時強整新
約束凌晨藝博山叩齒三十六手澆盆內榴更
洗牆根竹竹發覓小竿扶我參差菊老葵不厭
烹粥有新升穀騷雅一再過品隲鄴侯軸活火
煮嬾旗小佇聽波綠一椀清風生泚筆學雞鶩
所志急就章鍾索眈眈目樹影俄已圓散步衡
門曲北窻竹方牀湘簟容吾腹曹騰午夢殘塵
襟淨於沐夕陽挂疎窻自勸青州麪白雲足怡
悅黃花似相屬建安一以吟明月窺空谷課兒
口受書聊用寬幽獨誰云杜德機苦李但鹿鹿

秋意

秋風夫如何昔邪莽辭翠玄鳥去幾時羣芳頽
然醉豈不愛歲蕤蕭晨非所貴我欲賤天公勿
榮亦勿悴寒暑爲之端似別好醜類其况人間
世炎涼得無二爲珍松栢姿毋令骨體媮

壽樊無可

秋風弄奇色烟霞作意新牽牛樊仲父覽揆政

茲辰泠泠敬仲流而乃耻其塵何物人間須可
以壽谷神瑤池桃已折三食且厭頻出關圖自
佳五千難具陳不如一壺酒灑我白綸巾與君
快飲之鬪以見在身主人謝倉卒但有麩半春
起爲主人謀眼底未全貧樹頭棗如瓜啖之齒
生津東壁牙籤絲不妨充釣緡几席指顧間遂
窮水陸珍豈不成真率無乃非嘉賓愧俄發笑
歌目送西歸輪

席上有談禪者因賦此

頗負道民好耻與辟支偶大小品自佳淺之迦
談口端嚴八千相耳觀徒柳柳不如遣波旬解
脫五念肘羅刃亦復戢怨親籬盡剖黃金未見
田但耕方寸畝恒河沙有無且洗塵中垢何以
文寂寞遊戲龐眉叟何以調奢摩一醉聲聞酒
冥心世間法亦足證色受和南古先生龍象許
我否

貽王侯二子

紛吾雅好修秋蘭紉爲珮名都富才賢但覺我

形穢何悟兩通人口汝是吾輩骨相卽未奇肝
膽頗無類天馬雙行空下駟三舍退寧原已自
龍謬以尾相誨感子綢繆意中腸非所愛同聲
復同心無逐談交隊

題二小松

徂徠二仙子采藥獨孤山化爲雙松樹箕踞兩
徑間菁葱僅人意蒼髯不可攀自謂歲寒節生
小厭塵寰陋哉秦大夫雖老殊厚顏昨與梅竹
盟相將同閉關遲爾千秋苓爲我煉九還

登舟短歌寄線博士

出門欲何之忽凌天際想孤蓬烟雨中清波薄
雙槳衆芳競春暉一一落吾掌未須五岳遊兩
掖已蕭爽乃知寰中人故有物外賞何如在甕
牖咄嗟悲俯仰

旦發胥口經湖中瞻眺一首

瀛壖委菹藪地嶮隘山川混沌自太古決滂開
吳天仰飲咸池津俯灌東南偏龍宮喝瑰麗鮫
室閼幽玄孕化晨陽吐涵虛宵象懸洪流旣滿

沛列嶂亦迴延雲標海上闕石秀鏡中蓮開冬
眷肅氣落木浩無邊黃鵠有奇翼八表恣周旋
儻遇浮丘公歛忽蓬萊巔

慰侯中鵠

東門良爲達西河胡其癡誰不愛百年脩短難
自持自持旣已難安能男女私莫夭于彭祖殤
子未足悲大化故不齊善慶無叅差願盡寬喻
理商瞿以爲期

七言古詩

神龍歌

侯省吾書齋起龍賦此贈之

薰風吹海海水立琉璃宮中龍伯泣生小平吞
東海乾長空一唾星河濕自從灼鰲鰲骨輓岱
輿員嶠蓬蓬轉一朝謫籍自天來天矯萬丈令
之短陸沉人世幾多秋不潛川谷不潛洲牙爪
無痕頭角瞑乃在夷門侯生之牀頭牀頭有書
三萬軸書上雙花雙鳳簇鱗甲龜藏書作宮風

雲躡縮花爲屋春雷喚龍龍不起龍與侯生結
知已祝融報道賜龍環六丁刺刺催行李列缺
幻火齊豐隆考鼉鼓馮夷導水晶天吳佐樓舫
霹靂聲翻陵谷渾八十一片金光舞鳳花錯落
珍珠濺霞紋髣髴輕於線主人終夜奈龍何沐
手裁詩克祖餞欲去不去龍主臣壁間藉汝王
丰神一寸明珠銜未報敢驚七尺有恩身魍魎
辟易山鬼走魚鳥徬徨草木吼何限人間失箸
人談天無恙侯生口君不見葉公好龍龍滿牆
真龍一顧葉公藏何如日日龍相友龍來龍去
總相羊奇哉侯生饒隱德高標原是龍門客只
今魚服氣凌雲不然太白老人那夢得豐之劍
且埋獄陶之梭且裹足研頭阿堵暫畱睛三十
仙方聊自玉桂雲桃浪會須開鞭叱千巖萬壑
雷長虹爲駕風爲馬當與伯龍雅作商家霖雨
才

元日雪試筆示小槐

獨孤山頭雪鬱液團作瓊花鬪元日苦無長物

薦新年椒栢盤中雜六出稚子懽呼爆竹聲而
我聞之轉蕭瑟少小輕擲白日駒韶華似逐此
聲疾客年四十已無聞劫來四十俄加一壯歲
曾彈姑蘇琴公田再種漳河秫刺促浮名十載
強蓼莪兩罷吟唧唧人間百六嘗復嘗短髮何
繇終似漆以茲望千千秋權魚獵吾家鄴侯帙
一壺村酒抽一編醉後愛泚青蓮筆博山手藝
玉辟邪側理頻驅銀不律眼底恰有屠蘇盃條
風初破玄冥蹕雙燈獻葢雙摩尼青琅玕畔饒

竹實白雪勸我卷白波如此景物那可失牙籤
付汝覓淵源磊塊憑誰澆萃律飽吃仙字狎麴
生亦足粉飾不堪七男兒但存蓬蓽身歷落嶽
嵒非所恤君不見三日不飲形神疎一日無書
骨孔窒請看槐屋樊牟廉詩酒一生真僑盼

飲樊午溪宅對月得月字遂足十韻時王
還樸于少泉泊主人昆玉同席

暝色趨人雲俱沒長空贈我以明月絲肉生春
興遶新笑談疊出奇爭發醉舞惟知夜是良隗

俄不問壺將竭客狂已亂席間痕伎密又補樽
前闕五馬先生氣如虹三槐老子勃爲窟中有
逸少擁素娥何來定國能白髮主人二難工好
賓三雅那能大白歇野夫頗有丘壑因對茲景
物神逾越舉杯邀月友吾儕把袂凌風浸入骨
一字一歌藉草眠無妨小逕苔陰滑

宋鳳石以名博士量移藩師長歌奉祖

北風吹文星飄然辭穹蒼一墮盤溝濬倏忽七
載強七載寒氈逗六翮腹腰俛入梧捲格偃蹇
不遷知奈何旌書十道成虛擲世上蛾眉工陽
九縱奇不可時人口一朝除目量爲移王孫席
上稱師友憶昔塵尾魯諸生真珠錯落四座驚
囊中不律狂欲走祭酒先勤牛耳盟書帶幾年
蒸作草俱誇高足人人藻霞光十丈點菁莪御
史紛紛第上考那知上考解崇人連城漸輕官
漸貧豈無漢朝治安策長沙不救洛陽身有身
何處非樂土有冠何必挂神武平臺饒醴鈇饒
魚亦足麓了高堂脯詞伯只今推宋玉帝子況

是東平躅君不見塞翁之馬定誰羸梁園賓客
還非俗車騎逢迎已虛左擔簦祇有藥百裹問
君何物曳長裾相將明月清風我我有一粒玄
冰丸贈之五月兔園寒他日倘得枕中寶隻字
無忘寄古歡

母子雙節歌

屈母偕其女少同寡老同節云

王家姑屈家母八十冰霜守一女嗟哉女胡不
辰二十又作未亡人劉氏嬰兒但襁褓母女相
依竟相老母爲屈郎女爲劉四壁孤燈俱白頭
九原翁婿應含笑闔內猶傳左徒教

星槎歌

偶從陸太伍丙夜探星海中有一歲星不見十
八載光芒直射金線嶺乃是屈生浮槎雲甲影
生不願作金門客但願逐我靈均爲海伯一槎
嗟呀似古龍玉繩歷歷參差畫張家小兒尋岷
崙惜哉不始扶桑暎十二年來才一貫何如湖
海日天門五岳五培塿四瀆四汙尊黃河一線

流眼底蓬萊祇于座邊捫天孫支機石爲我作
棋博符籙三萬軸河鼓掛牛角南極老人過醉
奏鈞天樂北斗神漿足拍浮五色瓠瓜饑可啄
興來還欲叩廣寒碧海應無不死丹我有玄冰
僅刀圭乞與長庚爲朝餐回風點簡槎所有二
十八宿前且後惟是人間李謫仙占住酒星不
出手

秋雨謠

魯地木綿號上苗家家倚之爲瓊瑤手撥根株
開多少早摘不如遲摘饒誰知造物難意測秋
雨瀾月秋雲黑滿地落花總是泥欲往拾之行
不得場中有穀才上塲牆根有柴水底卧眼前
桂玉當告誰索租平頭闌入坐皇天不合尼田
父仰屋吞聲淚如縷此雨何不添會黃河水免
教妻男荷鍾苦

邵有恒兒醫

自從五色東陵始恂恂不乏伯春子爭似雲孫
肘後書須臾一字生人死前身恐是秦越人方

眼長睂筆有神上池一碗長桑水照見人間鬼
物真少年勃宰爲理窟崢嶸豪氣尋鰲骨富貴
那能網至人汝南市上壺出沒賣藥不論錢守
杏不須虎但得園中谷滿筐饑寒之輩恣所取
舉世相人空相皮那知此老胸中奇咸陽重少
不重老惟來驚道小兒醫

小槐過予山房采菊和酒謂白花甜黃花
苦就此二句爲長短歌

今日爲君整頓鸚鵡盃婆婆鳩鴿舞區區陶家
小兒不足數東籬之菊何歲蕤黃者白者參差
吐白者甜黃者苦潦倒鯨吞恣所取但得日日
與君醉花前不妨倉卒爲君主

醉歌贈友

貴亦一丈夫賤亦一丈夫昔脫短裘付酒罏人
人笑爾高陽徒有時醉獵南山下倒騎蕭家生
禿駒人間萬事無不作惟不能作平津客竭來
十載遊燕市眼中茫茫盡堪白黃金縱積如丘
陵何可枉沒長安城且爲盡買中山酒卧看悠

悠世上名

贈上林郎

長安一片夏雲高
驪歌首路青驄驕
錦鞍繡服燕山道
買臣五十何嫌老
兄昔爲文二十餘
名高藝苑人吹噓
鹽車一困三十載
貲郎聊自擬相如
君不見英雄生有七尺軀
東隅不獲收桑榆
功名適意無定局
唾壺一擊成躊躇
羨君懷抱風流伯羨君
頭顱尚如漆雄心休薄上林郎
塵世仙福疇與匹
請看伏櫪一長鳴
日向燕關頓超軼

侯公行

弔鳳麓翁

盤水城中一狂客
祭酒諸生稱詞伯
雲夢平吞錦繡腸
豁落已註神仙籍
婆婆儒冠閨裏過
烟霞到處卽隗俄
低昂百氏還不律
揮霍千秋且叵羅
一夕黑霾動地起
報道先生七尺死
當年豪傑竟何之
平生意氣長已矣
憶昔相羊習氏徒
鷓鴣尚在酒家胡
白雪吟成偏拉友
黃金散盡不恤孥
是時小子牛馬走
先生引入爲小友

雄篇惱殺俗人憐，郢聖但說憑吾口。才高一石不可量，孝廉往往飛旌章。二百餘年僅聞出，五十九歲胡其殤。自古文家苦百六，不合先生仍就木。麈尾談玄知更誰，連挂何人折五鹿。君不見三閭大夫楚，江溺大招小招招。招未得又不見，羊曇彌歲不西州。哭聲直徹古石頭，我今有淚潄淫下溪毛。一筐酒一竿，夜臺知是賞心人。岱嶽雲邊請迴馬。

元宵放歌時顧邑侯偕兩博士四三邑人

行燈

東風吹上元宵月，倒射人間金銀闕。絳蠟染天，天欲紅，繁星歷亂不得歇。六鰲負山立，向人山擁芙蓉抗冰輪，烟耶霧耶不可辨。電甲彷彿逐香塵，香塵莽互魚龍起，春光如海人如蟻。珊瑚滿路爛不收，飛入使君雙鳧底。使君顧虎頭，倚天拂吳鈞，文摧白鳳凰，才凌紫驎騮。一簾燈月不自私，兩袖攜來散盤溝。盤溝參差十萬家家，忽墮五色霞。明河不敢濕，良夜開遍潘郎一

縣花一縣花花都狂使君着意分末光不然浮
丘洪崖足把臂那須野人亦鴈行野人酒後耳
根熱搥碎月華克酒脣一步一燈一叵羅與君
酩酊臙脂雪不信請聽陌上歌聲聲召父絃中
切

水月墜送客還山

天高日莫南山深送君入山識君心百年幾何
貴適意雲水逍遙隨所寄側身泉石面千峰回
首風塵雅一世春遊不惜杖頭錢還山採藥可
長年白雲伴爾清溪釣明月還陪石鏡眠蔡經
背不受鞭洪崖仙可拍肩金丹何日來相授騎
騎茅龍直上天

孫文學祇台以少年祭酒諸生得廩爲歌

壯之 台音移

季子九歲能倚馬萬言一息三峽瀉先秦兩漢
枕籍間縱橫過眼十行下弱冠才高八斗多文
章照乘珠婆娑蒼茫古色未央瓦波濤直欲吞
銀河昂藏七尺如孺玖劒花時作秋風吼餘勇

崢嶸不盡闌筆端又賈鍾王走齊魯卽今富才
彥千英萬俊爭識面天孫何意錦爲箋人間隻
字三匹絹風扶搖烟披靡大鵬一怒垂天起笑
殺黃金培塿臺南溟踏破九萬里聞有珊瑚鞭
百尺光陸離明發度扶桑滄渤小于陂一釣三
山連六鰲男兒要爲天下奇君不見孫祇台

壽戴西渠八十四

盤水仙翁八十四白鹿青松知姓字但教海屋
添全籌不用塵寰稱半刺峻嶒骨相真難老鶴

髮丹顏更滿腦披襟愛賞故園花擲管便咏長
林鳥有時座設東陵瓜有時盤出安期棗有時
手拍洪崖肩有時心意麻姑爪兩子膝前兩麒
麟孫枝蘭玉爭芳芬南山爲豆北海醴斑斕舞
處歌停雲筵開玳瑁中秋月八百歲椿猶未歇
笑指滄桑欲盡更長生永註黃金闕

題楊荆溪計部祖母貞節卷

未亡人二十八一夜霜風連理枝傷哉兩兒何
忍慙兩兒來泣且呼前雛後雛同一孤相看俱

是夫托吾吾有孫兒有子寧知兩兒先吾死諸
孫何日能青紫一孫興騰鳳翼彈琴步步關西
式誰其迪之大母力八袞開天子旌楊家四世
有曰嬰歸報所天節且貞

陳豫西鳴琴軒

姑胥仙吏洪都客剖竹爲符海爲邑當年烟月
是揚州今日江山屬吳國迢迢官舍傍東沙仙
吏闕來只種花河陽不數安仁縣柴桑却憶陶
公家衙齋別有鳴琴室子賤風流在今日卧埋

元誇不下堂移琴幾見雙飛鳥鸞鶴聲中歎別
離鳳皇絃上憐棲棘南風亦自卑民財白雪還
堪和君什辭鄉去國已三年政與幽蘭曲並傳
紅塵落處隨春葉白雲飛時改夏絃莫歎大賢
勞百里且韻宮商動徵羽身非梁甫復楚妃志
在高山並流水一朝考最頌神君丹旆題名報
明主洪都直欲借長風雙鳥雲中會當起慚予
亦試武城絃長洲苑前春可憐家山高高廩丘
月吳水東流嗟遠天聊附知音慰知己何時爲

洗鍾期耳北新河路譽如香滕王閣記文如綺
使君風采何亭亭滄海無波羽檄停當筵別有
陳驚座一望遙占聚德星

聞友人得仙子幾日矣不以知我豈其貯
之金屋中耶忝詩嘲之

何處嬌娃春十五珊瑚弄月滄溟府唐昌顏色
安足誇千載瓊枝待君吐鴉頭波襪蓮生金桃
花遙向鬢邊侵雞聲昨夜畱歡處可能無意白
頭吟

夷門歌贈侯中鵠上公車

夷門侯生何開美琳瑯韻致神秋水骭髒不可
一世人肝膽直傾安豐李兩人相心不相皮狂
來逃爲田僧起蹤跡吾甘輕薄尹期卿但期第
一理一朝水擊乘風怒五色卿雲莽回注紫電
自車星自虬滄溟簸出珊瑚樹槌碎青虛醉月
明耳熱便草蟾蜍賦賦成白雪雪欲言須臾鵲
起春風顛春風吹醒曲江杏爛熳飛香紅刺天
千枝萬枝嬌少年非吾跋扈誰其前燕臺金燕

市筑鬱輪袍宣揚軸才子逢年正半千詞人得
駕無百六漢宮誰不探驪龍何如侯生筆底之
珠十二斛侯生侯生良太奇佳境佳氣雙陸離
青鬢斑斕故不俗兩年兩抱麒麟兒人生快事
巧合并巧在英雄得意時英雄得意殊不偶勸
君滿酌淳于斗萬里長風破浪行古歡一言煩
記取君不見攬捨化鯨鯢海波立相桺天子
東顧無好顏妾婦當朝徒棘手趣取大物安足
難須君砥柱縱橫口陳倉寶雞請自雄烟霞都
付畊堯叟

秋雨懷王侯二子

山林在城市惟我松菊主徑草故青青昨夜銜
新雨牀頭滿書酒滿甌酒可中兮書可讎美人
不來空清秋

快獨集卷之一終

雍野李先生快獨集卷之二

濟水李堯民畊堯父著

五言律詩

人日留太東小飲

晴色收雲淨高朋扶興新可憐抱影日猶對賞
心人白雪供唵嘯青樽破隱淪眼前幾知己莫
厭過從頻

同張邑侯登樊園樓

春光高處得一望入郊垆野濶疑吞綠林幽遶

出青鶯花容吏隱嘯傲狎山靈儘可扶殘醉
雲問福星

二月郊遊

大野春垂半千山景漸饒斷雲棲老樹疎雨釀
鮮飈青看柳全染紅歸杏半燒祇應扶磊塊徒
倚醉漁樵

同張邑侯飲樊震岡浣俗亭

日莫偏扶輿亭高自浣塵柳棲烏皮几杏拂白
綸巾萬籟低相媚孤雲迴見親座中列宿在未
敢摘星辰

郊送梁太東

鳧欲馳雙鳥尊仍眷一鞭以吾渭城酒送汝薊
門天意氣淹行色鶯花佐別筵驪歌毋太急咫
尺隔風烟

再送梁太東

別君芳草地芍藥乍含春雲亦停知已山猶戀
故人窮愁青眼倦孤抱白頭新肯爲憐丘壑雙
魚莫厭貧

寄屈少微

牢落春來況艱難別後書一尊徒四壁老友只
三間白髮誰同病青山自索居浮槎遙望極肯
作呂安車

送友

君行負高尚不爲急知音白雪巴人里朱門蓬
戶心風塵吾道在雨露世恩深別有凌雲賦從
他競上林

小槐莊居頗久不獲造訪忝筆問之 二首

歲月山中住沉淪似出家衣裳應草木談吐定
烟霞白石能無髓青門恐是瓜漁源倘許入蚤
駕呂安車

梧几吟才歇竹牀眺可兼鳥翻花樣樣蝶亂蕊
纖纖遲日如畱逕輕雲不滿簾一塵那得到足
佐野夫潛

賞第次蓮初蓮尚鮮

挾雨偏浮鏡凌風再吐霞一池雙挺秀三日兩
看花翠舞矜新調紅妝學舊葩醉來凝望處猶

作並頭誇

小槐省吾中鵠携酒過小池賞蓮限震字
白日下高尊紅蓮侵短鬢錦雲傍水流舞蓋凌
風震香逐小池生酒從三雅進夕陽影在牆醉
倚芙蓉印

虛壇道人偕省吾中鵠二難賞十蓮花時

池蓮開十朶

短徑來三益高軒到十蓮羊求雙白璧水竹一
玄僊湖目窺人小池頭愛酒鮮相畱魚鳥在同
醉甕中天

偕小槐冷莊觀蓮時有酒家陪坐

採蓮回暮色沽酒對新涼祈以尋幽興因之到
冷莊烟霞杯底落花柳座中香田父來爭席相
將醉夕陽

訪樊小槐逸人

一雨將秋至高朋携興來借君青玉案坐我白
雲隈蛙鼓喧涼月松濤濕小槐相攀忍不醉潦
倒卧蒼苔

獨飲

牢落停雲逕，淒其問宇廬。坐看秋已暮，不醉欲
何如。菊在聊親酒，玄成且罷書。一聲天外響，孤
鴈又愁予。

重九前一日夜坐聽雨

岸幘憐孤榻，攤書散二更。那堪連夜雨，都作送
秋聲。雲影搖燈白，波光入座清。所愁明日菊，難
得一餐英。

九日雨無菊

九日雲還黑，東籬菊未黃。人猶追落帽，花却負
重陽。雨豈勒新色，秋應逗晚粧。野人甘遲暮，偏
愛後時香。

秋日偕王際雲侯中鵠訪樊汝時山人得
青字

載酒論奇字，秋風過草亭。以吾三益友，問爾太
玄經。座逼輕雲白，竹圍小盤青。相看俱處士，不
愧德門星。

久雨忽晴晚坐

雲洗星初霽烟吞雨乍收誰來共明月獨坐一
丹丘遠杵寒相答孤鴻迥自愁可知蕭瑟賦不
是爲悲秋

訊邑侯病

善病胡爲爾經旬失放衙得非雲外鳥疑作酒
中蛇琴靜調新曲庭閣數落花清風應入骨那
用覓丹砂

閩小窻國醫

非爾來三老無人解十全平分上池水都入小
壺天穀滿園中杏囊餘財後玄避名澤不得莫
入瀾凌顛

晚愁

岸幘拋玄草搢願向紫冥淡雲流遠漢薄露濕
繁星徑色迎秋白山容倦夜青晚蟬至無賴淒
楚不堪聽

冬夜偕小槐飲其猶子盤陽宅得陽字

偶從樊仲父寒夜醉盤陽團月窺金罍疎燈散
錦堂歌扶杯底興酒入座中香把臂竹林下偏

憐阮氏狂

除夕大雪

今夕是何夕真成歲旣單誰將一夜雪分作兩
年寒老避浮名易春回短髮難勿令兒輩覺恐
減少時歡

仲春小槐伯仲飲予西莊班荆卜夜

地席何妨晚移尊趁木陰歸雲低入座棲鳥暗
窺林石髮憑風櫛松針向月簪春宵元可醉況
是漢陂岑

吾以小槐得瘍仙酒騎雲矣乃以人間未
了之緣自罷于其反也幸之

未逐瘍翁去還來覓舊歡爲憐三徑好不醉九
華丹詩草偏相戀鷗盟肯自寒逢人莫道破恐
作謫仙看

月初上走筆邀省吾

暝色收殘暑銀河澹欲星池吞初月白風戰亂
荷青花可團裯坐松還隔水聽柴門涼不閉宵
過草玄亭

問侯中鵠足疾兼訂賞蓮之約

高才元汝捷重繭是何祥得非耽解夏無乃倦
登堂鰲極憑誰立葵謀定自良藍輿諸子在肯
過水芝房

初秋再過槐翁賞蓮

爲愛濂溪趣還尋王儉池故人青眼在豪句碧
筒知舞葉驅殘暑飛花逗晚颺夕陽扶野興一
石可勝時

九日有懷小槐病不能訪

卧病謝塵事秋颺眷草堂嬾成中散慢醒入次
公狂菊媚籬堪采松圍徑欲荒不知落帽客何
處醉重陽

冬初小槐過山房賞菊

秋芳不肯歇一菊逗前榮豈謂蓬蒿徑而尋隱
逸盟疎花驕小院寒葉老孤城晚節憐同調相
看賦落英

雪中聞剝啄聲謂小槐過訪開門非也走

筆寄懷

閉戶袁安卧山城雪色浮似聞東郭履不見剡
溪舟孤影憐雙鬢一尊冷四愁美人乘興未寂
寞鷓鴣裘

贈李廣文

藉甚李供奉巋然詞賦英彩毫無下駟絳帳有
連城豐劒寧終鬱臺金故不輕龍門今已著珍
重杏壇聲

送樊子之成均

匹馬長楊外清秋發紫薇驪聲侵曉壯風色弄
寒微壁水添詞藻萱庭試綵衣芙蓉光在匣蚤
晚作龍飛

次小槐韻

大雅不風塵槐窻事事新鷲將花共友雲與水
同春靜得詩中畫狂餘杯底神應知龍卧客寧
爲世間馴

哭侯翁

絕代詞林哲新傳鬼錄人琴捐當六月川逝正
三春日月音容古江山涕淚新天涯有知己沾

袂惜麒麟

除夕辭臘

爆竹爭新歲屠蘇理舊甌
新添兒輩趣舊入野
人愁歲月窮堪味文章冷自讎
殘冬未忍別猶自戀羊裘

題辛大叅父母雙壽

堂上雙鸞鶴翩翩願不違
鹿門齊几杖瑤島對
金緋結髮難黃髮班衣故繡衣
長生吾有祝西岳永春暉

王還樸出闈輒發不十日捷書至爲詩遲之

憐爾真豪舉春風得意看極知
爭倒屣好去問彈冠駿人燕臺迥
談高碣石寒無論天遠近日
下醉長安

贈錢履齋

寫照是童年長遊戴鶡冠
祕傳非紙上巧思在毫端
以我形容老兼之鬢髮殘
勞君搖綵筆翻作壯夫看

予告得歸

幽意塵中得浮名醒後看人非南斗重魚自北
溟寬劔拂巉巖易杯澆磊塊難鹿門差足卧吾
欲日三竿

太東招看西園花

爲愛名園好無煩折簡呼一尊聊水竹三徑足
靡蕪風透花香細林銜日影孤薜蘿堪共隱不
必問江湖

憂旱

滿目蒼生淚村村禱未休空煩羣望走無復寸
雲流塵卷山河暝風枯草木秋青門瓜已矣誰
問舊時侯

喜雨

風淨塵初歇雲低雨乍勻山容深靄鬱花事倍
精神香入琴書媚烟浮水月新晚田差可藝不
共馬卿貧

除夕

除夕歡不極庭闈景倍鮮香遲飛篆細燭老躑

花圓妻整懸燈線兒爭帶歲錢屠蘇備幾許明日醉新年

張浩字憲副玉皇故香案吏也芝豈偶然發者讀諸君詠神草宛然在睫間何可當吾世不一採而茹之

神草隨仙吏朱樓結紫霞龍鱗何錯落雲母欲交加玉露溥三秀金丹散九華居然來地肺忽爾奪天葩

題刁稚渠園景

風騷偏地主雲物弔山莊近郭吞青野環流趨綠楊竹深魚鳥暇人靜薜蘿香便可名河朔愧俄莫厭狂

送侯中鵠省試

秋色在楊柳吟來好贈君片帆聊綠蟻前路卽青雲刻燭一青雪揮毫薄練裙才名自司馬着意子虛文

雨中同梁太東飲樊園

爲滌雙筵屐園林未肯晴借風醒草夢帶雨濕

松聲山抹輕雲白波添小澗清一丘促朋好不
礙酒縱橫

偕張聯堂遊解氏園亭

無尋河朔飲聯騎碎彊園榭僻林爲屋巖虛石
作門泉灑松間榻鸞窺竹下尊坐邊花滿目何
用覓桃源

贈梁計部兩郎君

天上雙奎壁人間兩鳳麟連牀問燈火方駕入
雲津水接三千翼席看伯仲珍杏園自家世對
起曲江春

贈楊文學

記汝嬰兒日當吾蓬累年汝真與玄草吾愧不
青蓮世講深羣紀詞名失後先好携丹桂色嘔
起杏花天

時事

萬死身還在孤臣恨未除誰憐巫馬力只問樂
羊書變出飛霜外情工射影餘卿能用卿法三
尺竟何如

約友人觀燈不至

明月新相媚芳尊興自乘有誰消好夜只我對
孤燈烟擁星疑動春回霞欲蒸何當一把臂郢
雪共憑凌

趙庭言侯中鵠二美夜過

世路難知已翩翩爾自雙似聯明月璧同到白
雲牕倚馬才俱老持螯意未降悠然念朋好徙
倚坐殘缸

夜過友人

爲載稽康酒來陪阮籍碁故人青眼在高枕白
雲期海色清殘暑花陰逗晚颺莫須成故事折
簡便新詩

午日有懷

孤城逢此日還憶去年期只自饒三韭那能辨
五絲欲眠須引卷觸熱未呼卮醒醉元同意寥
寥識者誰

春暮擬郊遊病未果

春芳餘復幾塵恙苦相仍負杖才堪起單衣已

不勝溪畱花共入山待月同登欲往招公子無
言病未能

秋日莊居客過

委巷高軒過孤村秋色深開林驚鳥雀推案罷
書琴碧雨抽筠谷紅霜點柿林掃苔遲車馬踏
遍菊花陰

曉望

暝色初分霽朝光散曉寒翠微丹氣繞青浦露
英溥浥樹開新潤增輝躍遠瀾常因得起蚤宛
在赤城看

訪幙峰讀書處

雲合欲飛雪仰天辨夕陽因尋讀書處數問牧
牛郎近郭吞青野疎林散白楊相逢喜無事先
遣具壺觴

送友人之官

鳧嶧總前驅君才豈後途帆憑高嘯疾醉失大
江孤莫雨三臞國秋風五父衢夢魂相向處何
地不踟躕

飲梁園

草閣長堤畔通幽小徑深秋空鴻墮影返照樹
移陰看竹臨池坐耽詩對鳥吟主人能愛客尊
酒日相尋

侯中鵠以趙庭言來余別庭言三年所矣
欣焉得句

久別談玄塵琴尊此夜聽酒從新秣白眼向故
交青下里非春雪高齋動客星誰云更漏急竹
色在前庭

甲鵠見况

自喜逃名去何期間字來避人甘學圃畱客與
登臺花石供幽興風雲待異才侍童諳野曲聊
以送餘杯

慰顧大夫中論

不道含沙者真成風馬牛剖心難楚璧側目易
吳鈞芳草尊前淚孤琴病裏秋蒼生自陽九何
必怨沉浮

弔鳳麓公

可惟詞林彥一朝岱嶽遊人疑是中聖誰信卽
藏舟身世今旋古風神去不留好音那更覓極
目入雲愁

贈王生

三槐真有後秀起季常看芹影侵雲麗天香拂
袖奇家傳陽白調世禪棟梁姿會見偕羣鳳翩
翩下玉墀

快獨集卷之二終

雍野李先生快獨集卷之三

濟水李堯民畊堯父著

七言律詩

除日梁太東枉駕山房

歲暮逢人慰所思天教二子會心時但傾李白
今三斗休賦梁鴻舊五噫霜色對懸匣底劒風
塵各歎鏡中絲相看傲吏惟吾輩慷慨何勞問
數奇

獻歲十有四日爲余初度旣拜萱堂卒成

俚句

壽觥三十七回新猶是盤溝落魄身木鹿行藏
拙屬我雲霄事業苦隨人屏無姓字終非貴架
有詩書未當貧獨喜北堂春日永年年先祝白
頭親

于文若詩寵余行謂當畱侍金馬依韻賦

別

肝膽河梁對酒餘孤臣何處問吹噓也知金馬
門堪隱政恐明光賦不如海月高飛南浦鴈春
風忽散北溟魚男兒膽有丹心在肯負英雄勸
駕書

同張邑侯飲樊氏園亭

東風吹醒杏花魂司馬亭臯逗晚尊春色故偏
陶令酒夕陽猶戀謝公墩月銜竹影侵羅袂濤
卷松聲入瓦盆此地追陪須醕酌不妨燈火破
黃昏

送梁太東之平谷

雙鳧遙帶五雲橫握手東風緩客程劔氣不隨

楊柳折驪歌偏入薊門行
桃花新散漁陽錦琴
水曾飛海國聲解道羽書
閔北斗好從撫字覓
長城

夏日遣懷

方牀細簟少塵埃
午倦拋書蝶使催
葵影曹騰
勿暫往竹聲敲
戛笑仍回主盟風
月應誰讓領
略山林未有才
數盡落花無一事
自支鐺足煮
新醅

午日病目禁酒

竹葉新開午日醺
雙眸愁對醉翁亭
亦知景物
催頭白無奈壺觴礙
眼青安石浪燃鐺
外火昌
陽虛惹壁間瓶
由來楚客慵于酒
敢說明時故
愛醒

賞初蓮

錦雲池上弄烟霞
冉冉香生第一花
白眼論交
得淨友青蓮結伴
是通家未須十丈
尋峰頂便
可三盃醉水涯
爲語兒童莫輕折
芙蓉裳許度
年華

龍別二侯生

一天鱗甲散書樓風雨冥冥夜色愁自分已偕
雙鳳隱誰令先去五湖遊匣中劍在驚相泣領
下珠藏暗莫投大小茅君元我輩禹門高處遲
仙舟

小池芙蓉大發十朶最後一花南面而中
巍然有主盟狀賦詩賞之

亭亭高立水中央風散琉璃分外香似爲九華
添領袖獨當一面擅池塘山連翠葉雄雲色樹
拂紅衣冠錦妝自是不羣君子調肯同塵世鬪
花王

偕諸耆英祝樊震岡初度

又向仙家問海籌年年紫氣醉高秋對門有客
能青眼握手看君尙黑頭景入新涼餘嘯傲人
逢舊好倍風流毋嫌小友傀俄態難得香山爛
熳遊

星槎散入牋天謂十六日大雨信

忽漫星槎挂野城瀟瀟一夜走長鯨杖頭湖海

懸相約塵尾風雷莽自鳴遂有羣靈開練色卽
看何地不秋聲幾人奇中談天口塵世仙才未
可輕

送邵有恒之青齊有恒善醫

風捲中原一鴈秋又看百二策驂騮壺天曉破
雲門色池水春生海岱樓自是名山容汝卧何
妨白璧向人投只今從事還堪貫客裏無勞問
蒯緱

梁太東詩至却寄

盤溝文字半蓬蒿北望詞人首重搔自汝不畱
千里足與誰同結五陵豪書來彩筆干星斗別
後空山老布袍何日華陽還舊館肯教白雪負
吾曹

小槐過我脩文酒之盟于菊齋吟嘯大醉
一菊蕭然四壁空也隨詞客醉秋風歌殘白雪
來天上酒引黃花入座中杖屨不寒牛耳約姓
名欲附鹿皮翁人間賸有狂生在那得相逢與
易窮

侯志確刻龍飛詩厠以鄙句

半壁龍鱗跡尙新紛紛才彥走陽春如何信口
閔中句也作高山調裏人賦罷水雲愁汗漫書
成風雨鬪嶙峋六丁十日如畱在尊酒同君取
次論

送張西星司教績溪

春風坐遍魯諸生江左除書促主盟千里帆檣
開斗色幾行桃李借文衡青瑣特地南吾道赤
幟還須甲楚城最是硯中饒典籍一官應並紫

陽清

賞牡丹

花開三月雨初新席傍瑤臺轉媚人詩入品題
蜂欲妒酒分香氣蝶生嗔不隨穠豔予時日聊
以風流吐世塵桃李漸緣鶯語歇青皇獨許殿
陽春

默菴上人主招提冠帶爲舊會主予

十年蘭若問根塵不漏惟君有勝因定後已持
開士律閔來仍出宰官身恒河暝借金篦導貝

葉玄從塵尾論蓮社于今得盟主不妨陶令酒
行頻

悶

身世蹉跎老竹林林中事事足蕭森半牕渾日
還高卧短髮如星不慣簪五六部經頻見役兩
三盆菊當知音玄亭賸有年來字那得奇人載
酒尋

王正六日始雪友人樊少溪偕其伯兄見
訪大醉

三冬才見六花零有客相將過草亭誰送小牕
渾是雪恰來處士又爲星囊供舊句圍爐課竹
弄新聲帶酒聽我醉欲狂君莫去主人眼底不
多青

侯中鵠下帷學杜征南索詩自壯

八斗猶來問字頻吾曹得汝越精神卽看藝圃
無雙士不謂盤溝有此人莫遣蠹魚閔四壁儘
容筆陣鬪三秦黃金臺上元虛左合是侯生第
一賓

樊榭魯往從予遊有雋才起家太宗伯儒
者祝篆

曾記玄亭斗色賒沾沾御李但侯芭故人愧我
還三徑仙吏多君入五花驥子能傳司馬印鳳
毛不改尚書家春曹伎倆渾閑事雪霽堂中慶
未涯

司馬雙巖公
有堂曰雪霽

樊盤陽遊國學舉男子雙慶

雪堂佳氣媚宮袍總是尚書子姓豪稷下人從
孤劔重滕邊天送一星高相看四世龍爲種並
數中原鳳有毛司馬幾家能奕葉好憑經術說
虔刀

宋鳳石以名博士攝曹篆得代諸臺爭獎
藉賀以詩

旌書十道走蘭臺爲愛風流宋玉才五載青氈
寒夜月一囊白雪卷蓬萊經傳廩水春相坐花
借曹陽手自栽六館只今君作斗可能無句賦

三台

午日送仝盤巖上成均

仙郎馬上酌丹榴北指賢關經軸儼六館何人
推快士諸生得爾足名流青尊夜倒橋門月孤
劒風凌槐市秋明日龍頭空冀北不妨書劄報
吾鷗

携酒之莊上感吾弟輒罷

黃鸝三請過山莊懶向園林到醉鄉楊柳故牽
他日線葡萄還釀舊時漿烟霞自護蓬蒿徑鳥
雀空閤薜荔房回首池堦何處夢一尊無計取
徜徉

侯中鵠覽揆之夜椒蘭粉黛無所不悉其
款瑤池之役當退三舍美而賦之

如雲綦履足翩翩共祝風流小謝年玳瑁幾人
共瑤草岡陵無字不青蓮坐侵蘿月真騷雅歌
入桃花失管絃惟道夷門別氣象德星牛女各
當筵

雨餘賞山莊甕蓮

南風吹送大槐安小有芙蓉眼自寬鏡裏懸波
風拂綠池頭出色日烘丹花酣巧入三更雨露

碎平添五月寒千載青蓮慙我在不妨爛醉水晶盤

張邑侯樓子成秋夜拉友人登飲

客子相携選勝遊獨孤山氣滿城頭尊前白破
雙鴻暝笛裏黃催一葉秋風捲清砧平入座月
扶堞影巧當樓不妨醉摘天邊斗爲有張星是
我侯

暮雨樓寢

晚樓着雨四飛涼清入樓頭小竹牀卧教二子
風雲句目送南牕水月光斷靄籠陰山墮綠疎
烟赴暝樹銜蒼道人一枕天門夢那問明朝日
幾商

樊太夫人八袞

飛飛青鳥赤花虬金母張筵第一樓八十年都
蓮作月三遷子已鳳爲儔愛看槐屋頻移杖喜
對麟孫未白頭借問瑤池桃幾在可能容入歲
星不

壽樊震岡兼呈社中諸老

高秋嶽降鬱嗟峨五馬抽簪鬢未皤漁父歌從
江上得老人星只酒中過百年翰墨和烟月七
世恩波付薜蘿聞道高陽明日會相將小友醉
如何

送張鍾琰會試

風送孤城白鴈秋燕山詞客罷遨遊銜杯古道
雲全黑立馬東門草半愁我愧平原無十日君
如張翰卽扁舟應知別後多芳訊霹靂聲來識
狀頭

聞王際雲卜宅

散帙高秋問菊莎孤山無伴影蹉跎握中明月
誰相貴曲裏陽春祇自歌有地肯容王粲入何
人能逐李膺過南隣不用十千買只醉君家一
叵羅

小槐尊慈七旬有五

菡萏偏宜綵戲辰于今七十五回新筵開司馬
長春第酒上扶鳩太淑人膝下三遷渾是孟眼
前四代總如荀夜深試向天南望歷歷賢星睽

紫宸

冬夜訪陳博士畱飲

爲尋尹喜人丹丘首宿盤空也自畱一榻寒雲
屯斗室半瓊皎月對羊裘携來雙璧渾無夜彈
罷孤琴別有秋識得野人乘紫氣五千明日對
君讎

壽戴西渠別駕

歲星高卧五雲間咫尺仙翁未可攀半刺甘棠
還白口千秋華髮借青山花陪杖屨頻尋句鳥
送烟霞且閉關爲問瑤池桃幾在鏡中朱得老
人顏

臨川引年冠帶

廩水東南玉有烟歲星高挂五雲邊露凌白鶴
秋增爽人倚黃花晚帶鮮抱甕自煎松底石逃
名不射世間緣應知華髮輕冠蓋優老其如聖
代先

九日小槐以詩來謂有友于之樂悵然感
賦

不分君家九日臺登高之宴弟兄開霜前懶道
茱萸在雲外愁看鴻鴈來宋館秋聲無客賦楚
江花落有人哀孤山抱影飛蓬鬢那遣流光到
菊杯

戴西渠乃孫遊太學

見說槐林已著聲詞壇小戴頓崢嶸一枝肯作
尋常桂尺璧能收十五城秋色偏騰千里足橋
門爭走少年名還從鴈塔看前輩莫向龍頭負
此生

送梁太東公除北上

郊門紫氣落秋烟入望關河尺五天千里露清
簫鼓夜一帆月挂孝廉船故人抱瓮能無恙使
者乘槎雅自仙去住不須論劍合黃花白鴈醉
相牽

十月對殘菊獨酌

三徑全荒一菊存逗遛秋色點衡門千林落木
誰堪殿十月餘花爾獨尊香在不隨黃葉老寒
來猶借白雲屯野人最是孤踪客大可同盟潦

倒樽

壽樊幙峰

寒日山頭幙作峰峰峰春色吐蒙茸平將遠勢
凌盤水雅有高名對岱宗峭壁鏤烟飛兩鳳疊
嗥吹瀑走雙龍野人愧是青蓮客已醉芙蓉二
十冬

仝歷川登岱還

客來滿袖烟霞氣云到齊東岱嶽頭日觀光搖
吞海色天門澗落俯河流雲扶一杖丹丘小歌
入中原白雪愁肯借錦囊詩裏畫不妨蓬蓽卧
爲遊

送王際雲上春官

五陵佳氣鬱蒼蒼有客雄飛意未央臺上烟雲
歸駿骨匣中風雨送魚腸毫揮北斗晴嵐濕杏
逐南宮曉日香聞道縣官還羽獵非君誰與賦
長楊

送樊盤陽詣成均

蚤歲蜚聲盤水陽才名小試得諸王風雲一日

名堪重冠帶逢時姓亦香草色秋分離思遠江
濤寒引壯心長知君不羨平臺貴匣裏龍泉謝
久藏

又

昭陽宮闕鬱嵯峨才子翩翩挾冊過郭隗登臺
知士貴禰生懷刺得名多天邊碧水懸星斗日
下橋門環講訶見說五陵多俊彥草堂莫戀舊
烟蘿

邑司教程鳳山至自歷下且六稔矣屈指
數十年廣文亡不人人甲先生者茲以
襄邸之命行爲詩祖之

十年博士典文盟此日移官向楚城化雨聲爲
齊一變春風坐是魯諸生雪中轉見王孫立席
左還先醴酒迎誰道青氈渾似舊西京賈傳有
餘名

壽孫荆亭藩理時未舉子

荆山池畔五雲亭相國開筵夜不扃總是王門
冠已掛况逢生日酒堪停坐環水竹疑仙苑老

向烟霞是歲星南極
惟來光閃爍多應射入蚌珠屏

壽小槐詞伯公有萱堂八句

八月星飛海上槎
少微高處近蒹葭
柴門烟老滄洲色
秋日晴驕處士家
豪句數從三雅入
壯心偏向二毛誇
醉來愛把山人袂
難得斑衣戲綵花

贈梁太醫

翩翩才俊數諸梁
君復何來五色方
自是奇人多國手
故將仙子拜醫王
十年心事林邊杏
一日風雲肘後囊
試問小馮調鼎訣
勳名好去老岐黃

侯鳳麓執斯文牛耳
有儒行予私心嚮往

馬六月冀一莢日聞訃爲詩哭之

歡娛舊事不堪論
細雨空堂倍愴神
三徑落花誰是主
一丘荒草已爲陳
猿啼中夜悲君座
鶴唳西風斷客輪
愁見梁間新燕語
可能飛喚夜臺春

樊無可五甲子

槐屋山人不愛醒興來倚馬句泠泠世看綵筆
還詩聖天許閱身當酒星白雪逃名高歲月青
樽怡老足滄溟社中愧我忘年友願祝千秋鶴
髮齡

少溪公子以辭賦名家屈首簿書爲詩贈

別

白石英頭抱玉虹故人匹馬大江東名山自可
供詞客清世何須薄贊公琴月半高新簿領鳳
毛爭下舊家風知君豈少陵陽淚遶齒婆娑未
是窮

送王際雲對公車

王郎拔劍俯崑崙意氣飛揚走薊門自是連城
偏有價誰言三刖不爲恩驂騮步老黃金勒鳩
鵲春濃白玉樽明日看花歌舞夜參差星斗共
誰論

歲杪喜茂苑陳春元過我

匹馬衝寒問隱淪一時驚座有陳遵十年夢寐

歸知已千里風霜急故人星聚豈嫌雞黍薄酒
深轉見笑談親自慚不是襄城李浪作龍門恐
未真

陳毅軒獨雋北上


樓上元龍雅自雄詞場獨步大江東巨鰲拔浪
天兼立一鶚橫秋斗欲空白雪調孤餘劍氣黃
金臺迥試春風何時快爾芙蓉夢霹靂聲來五
祚宮

壽萬邑侯

鬱葱佳氣擁霞杯此日春從茂宰來借問庭前
人幾祝都如縣裏花爭開絃歌對寫冰壺調鳥
影遙分水月堆惟得琴堂雲縹緲郎官一宿動
三台

別小槐

老槐槐畔敞雲樓豪氣元龍坐上頭古樹垂蘿
屏疊錦小山吐月玉爲鈎籬邊松菊隨詩王洞
口烟霞倩酒畱分袂獨憐成遠別一樽那惜鷓
鴒裘



Vertical columns of text on the right side of the page, likely bleed-through from the reverse side. The text is faint and mostly illegible due to the watermark and image quality.

